



In giast regular da l'hotel «Belvédère» è Bill Clinton (san.), l'antierur president dals Stadis Unids da l'America. Qua cun Ernst Wyrsch, il directur da l'hotel da tschintg stailas.



Claudia Casanova, substituta da guvernanta en l'hotel nobel a Tavau. FOTOS G. N. STGIER

«Qualitad ed in bun servetsch vulan noss giasts»

Forum economic mundial «FEM» a Tavau

DA GION NUTEGN STGIER / ANR

■ Per quatter dis è Tavau stà en il center da la prominenz politica e da l'economia. Schefs da stadi èn s'inscuntrads cun ils manaders da bancas e cun ils directurs generals dals gronds concerns dal mund. Nus dentant essan stads in di en l'hotel «Belvédère», la meglra adressa da Tavau. Il «FEM» 2011 a Tavau è gia istorgia ed a partir dad oz è la vischnanca puspè in lieu turistic per tuts quels che gaudan lur vacanzas. Pli pauca hectica e dapli temp per ses giasts ha er Ernst Wyrsch, il directur da l'hotel «Belvédère», in hotel nua che mintgin ha l'impressiun dad esser in retg. L'hotel da tschintg stailas è durant il «FEM» il lieu nua che l'amizia tranter ils prominents vegn tgirada ed il lieu nua ch'ils directurs generals entaupan en ina localitad secreta ils presidents dals stadis. L'hotel «Belvédère» è davairas la chasa nua che mintga participant dal «FEM» va almain ina giada en ed or.

400 emploiads durant al «FEM»

Mintgin che vul ir en l'hotel «Belvédère» durant il «FEM» ha da passar ina controlla sco per exempel a Kloten a l'eroport. La controlla è obligatorica per tuts e quai senza excepziuns. Quels dis dal «FEM» datti be in'entrada per ir en l'hotel da luxus. L'hotel è circumdà dad ina saiv da filfier cun spinas, da blers polists, quai tut per la segirezza da las persunas da num e pum. Tiers ses maraton da lavur ha Ernst Wyrsch, il directur da l'hotel «Belvédère», chattà intginas minutas per il schurnalist da l'an e scribent da quellas lingias. El haja be durmì trais uras, ha ditg l'um da 48 onns, ch'è dapi 15 onns in ospitant scharmant per tut la

prominenz politica da quest mund. Il temp dal «FEM» saja betg mo per el in maraton, mabain er per sia dunna Sylvia Wyrsch e per ses 400 emploiads. Er els lavuran prest di e notg e tiers las bleras uras lavuran els cun plaschair. Quels dis dal Forum economic mundial lavuran supplementar 200 emploiads en l'hotel da luxus. «Nus avain insumma nagina fadia da chattar gidanters be per quels paucs dis da l'occurrnza internaziunala», di Ernst Wyrsch. Ina buna part da quels gidanters supplementars èn antierurs emploiads da l'hotel, amis da la chasa, auters vegnan tar nus pervia dal gudogn accessoric e fitg blers simplamain per plaschair. Mintg'onn avain nus ina glista da spetga per quels 200 gidanters supplementars. Il «FEM» è adina puspè ina sfida betg mo per mai, mabain er per tut mes emploiads, manegia Ernst Wyrsch.

2500 persunas per di

Mintga di durant il «FEM» van bunamain 2500 persunas en ed or da l'hotel «Belvédère». Ernst Wyrsch conuscha natiralmain betg tuts, dentant ils visitaders prominents dal Forum economic mundial bain. La qualitad e cunzunt il servetsch èn la basa da success per l'hotel da tschintg stailas. Quels dus facturs èn dentant er ordvart il «FEM» l'emprima devisa, di Ernst Wyrsch. Noss giasts pretendan quai, sajan quai quels dal «FEM» ubain ils auters. Remarcabel è tuttina che quels dis nua che tants giasts èn en l'hotel sco durant il «FEM» è il directur Ernst Wyrsch inclus ses 400 emploiads gentils, da buna luna e cunzunt quiets. Quai vala er per Claudia Casanova da Falera, ch'è dapi dus onns la substituta da la guvernanta en l'hotel nobel a Tavau. «Il temp dal «FEM» è bain dir

per nus, dentant fitg interessant e cunzunt varià», di la dunna.

Ina tonna laschiva per di

L'hotel da luxus ha 127 chombras, 30 suitas e numerusas localitads per mangiar. Quels dis dal «FEM» han Claudia Casanova e ses collavurats sa chapescha blera lavur. En in di duvrain nus radund ina tonna laschiva, saia quai rauba da letg, tuaglias e serviettas euv., ha ditg la Sursilvana. Quels dis dal Forum economic mundial avain nus radund 200 occurrenz per di, ha ditg tut losch Ernst Wyrsch, il directur da l'hotel «Belvédère». Quai saja banchets pli pitschens, banchets da gala ubain aperitifs cun piculezzas finas. Durant il «FEM» preparan ils 70 cuschiniers 700 ensolvers, 1000 giantars e 2000 tschainas. Natiralmain che mangiar è pussiavel en l'hotel «Belvédère» durant 24 uras. Controlladas vegnan tut las victualias ch'ils furniturs portan mintga di. La segirezza è er qua da gronda impurtanza.

Durant il di pauc alcohol

Durant il di vegn betg bavì uschè bler alcohol. En quels 15 onns sco directur da l'hotel haja el durant ils dis dal «FEM» anc mai vesì ina persuna sturna, di Ernst Wyrsch. Da la damaun fin la saira vegn cunzunt bavì blera aua, Coca Cola e café. La saira cun las tratgas exquisitas baivan ils giasts nobels er vins pli custaivels che custan fin 5000 francs per buttiglia. Quels dis dal Forum economic mundial fa l'hotel da luxus ina terza da la svieuta annuala. Quai è bunamain tschintg milliuns. «Nus profitain natiralmain l'entir onn dals giasts dal «FEM», che turnan adina puspè gugent en nosa chasa», ha menziunà Ernst Wyrsch cun ina tscherta luschezza.



Er en cuschina na dastga mancar l'organisaziun.



Quels dis dal «FEM» portan autos da luxus ils giasts en l'hotel da tschintg stailas.



Bavrondas da fritga frestga fan ils umens da las bars per ils giasts.



Thomas Borrer (dretg), l'antierur ambassadur svizzer a Berlin, cun in giast avain nus er entupà.



Hans Escher, il concierge è la buna olma dal hotel.